

Sortu sortuz, independentzia eta sozialismoa eraiki nahian

Tolosaldeko eta Leitzaldeko hainbat herritan, alderdi berria eratzeko lehen batzarra larunbatean egingo dute

Asier Imaz

Ezker abertzalea alderdi berria sortzera doa. Herri Batasuna eta Batasunaren ondoren, Sortu etorriko da. Tartean, hamaika hauteskunde zerranda eta koalizio joan dira, gehienak epaitegietara. Sortu alderdi berria herritarren parte hartzearekin osatu nahi du ezker abertzaleak, eta horretarako, batzarrak egingo dituzte Tolosaldeko eta Leitzaldeko herrietan.

Sortu prozesuko lehen batzarra azaroaren 24an, larunbatean, izango da. Hasiere batean, eskualdeetako herri nagusienetan. Ondoren, gainontzeko herrietan «beste modu bateko» batzarrak egingo dituztela azaldu dute Tolosaldeko ezker abertzaleak.

Alderdi berriaren eratze prozesua 2013ko otsailaren 23an amaituko da, I. Kongresuarekin. Sortu prozesua nazionala izango da, hau da, Euskal Herriko zazpi lurraldeetara zabalduko da alderdi berria.

Lehen eztabaida

Tolosaldeko eta Leitzaldeko herri nagusienetan lehen batzarra azaroaren 24an izango da. Sorturen oinarri ideologikoen inguruan hitz egingo dute bertan, eta adostasunak zein desadostasunak aurkezteko aukera egongo da, baita ekarpenak egiteko ere, ezker abertzaletik azaldu dutenez: «Bere burua ezkertiar eta independentista sentitzen duten guz-

↓ Lehen batzarra

AZAROAK 24, LARUNBATA

- **Anoeta.** Auditorioan, 10:00etan.
- **Amasa-Villabona.** Kultur etxean, 09:00etan.
- **Ibarra.** Kultur etxean, 09:00etan.
- **Leitza.** Erleta eskolan, 10:00etan.
- **Tolosa.** Kultur etxean, 09:30ean.
- **Zizurkil.** Atxulondo kultur etxean, 10:30ean.

tiak gonbidaturik daude; Zutik Euskal Herria ebazpenaren edukiak bere egiten dituen donor, lehenago ezker abertzaleko kide izan edo ez».

Alderdi berriaren dinamizatzaileen esanetan, lehen batzarrean eztabaidatuko dituzten gaiak, hau da, oinarri ideologikoak, sarean aurkitzen dira edonoren eskura: «Txostena nahi duenak *sortu.net* webgunean sartu behar du. Bertan, *Ponentziak* atalean, larunbateko eztabaidan aztertuko diren gaiak aurkituko ditu: Independentzia, sozialismoa, feminismoa, euskara, ekologismoa, internazionalismoa, aniztasuna eta pertsona askea eta demokrazia parte hartzailea».

'www.sortu.net' web orrian zintzilikatu dute eztabaidarako ponentzia

Larunbateko batzarra dinamikoa eta parte hartzailea izatea nahi dute dinamizatzaileek

Ezker abertzaletik azaldu dutenez, ponentzia irakurrita ematea komeni da: «Batzarra dinamikoa eta parte hartzailea izatea nahi dugu. Horretarako, metodologia berri bat prestatu dugu larunbaterako. Hasierean, herritarrek talde txikietan banatuko dira, ondoren, guztien arteko eztabaida eta bozketa orokorra egiteko».

Txostenean jartzen duenarekin erabat ados ez dagoen herritarrek, bere ekarpenak egiteko aukera izango du. Ezker abertzaletik azaldu dutenez, «batzarraren dinamikarekin ez hausteko, ekarpenak etxetik idatzirik ematea gomendatzen dugu».

Gomendiotik gomendiora, behin eta berriz azpimarratzen dute parte hartzearen garrantzia Sortu prozesuaren dinamizatzaileek: «Iraultza demokratikoa martxan jartzeko bitarteko gisa, herri honen askatasunerako tresna baino ez dugu izan nahi. Euskal Herriaren independentzia eta sozialismoa eraiki nahi duten gizon eta emakume orori, gazte zein helduei, Sortu prozesuan parte hartu dezaten eskatzen diegu. Prozesu herritarra burutu nahi dugu, eta horretarako herritarrekin batera egin nahi dugu bide».



Goierriko eta Tolosaldeko Sorturen dinamizatzaileak Ordizian, larunbateko batzar «dinamikoa» prestatzen. HITZA

Larunbateko batzarrera joateko deia egin dute, Tolosan

Kultur etxean elkartuko dira 09:30ean eta haurtzaindegia egongo dela esan dute aurkezpenean

A. Imaz Tolosa

Sortu prozesuaren lehen batzarrak irauten duen denboran, larunbatean 09:30etik aurrera, Tolosan haurtzaindegi zerbitzua jarriko dute. Euskaraz adierazteko arazoak dituztenentzat, aldiz, lan talde propioa prestatuko dute. Erabaki hauekin, Sorturen dinamizatzaileek, parte hartzea bultzatu nahi dute. Horrela azaldu zuten herenegun, Zerkausian emandako prentsaurrekoan. Bertan, prozesuan parte hartuko duten 40 herritar inguru elkartu ziren, udal ordezkariak tarteko. Guztiek, tolosarrei Sortu prozesuan parte hartzeko eskatu zien, larunbateko batzarrera gonbidatuz.

Eider Olazarrek eta Manex Izagirrek hitz egin zuten Zerkausian, eta azaroaren 24ko batzarraren helburua zein izango den azaldu zuten: «Lehen eztabaida honen helburua, sortu nahi den indar politiko independentista eta sozialista berriaren perfil politiko-ideologikoa zehaztea izango da».

Hurrengo batzarrak

Sortu alderdiaren eratze prozesua otsailaren 23an amaituko da, I. Kongresuarekin. Tartean, lau batzar egingo dira, eta Tolosan, kultur etxera bideratuko dituzte



Manex Izagirre eta Eider Olazar tolosarrak, herenegun, Zerkausian. A. IMAZ

guztiak. Bigarren batzarra abenduaren 15ean egingo dute, ordu eta leku berean. Kasu honetan, ildo politikoari helduko diote. Horrekin batera, barne hauteskunde prozesurako hautagaien zerrenda itxi nahi dute.

Urtarrilaren 26an egingo dute hirugarren bilkura. Antolaketa

eta funtzionamenduaren inguruan ariko dira eztabaidan bertan. Kongresuaren aurreko azken batzarra, otsailaren 9an izango da. Egun horretan, barne hauteskundeak egingo dituzte, hau da, herriko, eskualdeko, herrialdeko zein nazional mailako zerrendak aukeratu dituzte.

MENDI-ALDE

Egunko menuak eta karta Bataioak, Jaunartzeak...

Jatetxea

San Esteban auzoa, 39 • Tel.: 943 65 17 99 • 20400 TOLOSA

Beti nahi jatetxea

Garaian garaiko janariak Arraikietan berezia



943 67 33 81 / 943 67 19 20 • Erremerterri kalea, 16 • 20400 TOLOSA